

玉笥集

八九十終

三完

柳田文庫

文庫11

D 206

3


10

15

20

25

30



010190556102

文庫 11  
D 206  
3



玉笥集卷八

近體五言

瑞柳十二韻

綠霧靄華滋柔條著地垂玲瓏隔翠幙婀娜拂長絲種  
近臨春閣分來太液池彩堂依密蔭珍幹夾宏基九烈  
朝衣貴三眠晝漏遲汗溝全盛日張緒少年時裊裊含  
芳色茸茸發令姿藏鴉春尚淺拂燕舞頻欹沐雨披雲  
髻鬢烟斂黛眉妬深渾是恨嬌重半如癡莫訝多纖麗

元

張憲

撰



何曾識別離更培連理樹相對映門楣

投贈周元帥十韻

玉帳臨江近金城鎮海遙鼓聲秋動地劍氣夜衝霄露  
下星河白風高草木凋山寒旗獵獵沙靜馬蕭蕭左廣  
初傳駕西船已畏燒五離纔散鼠六博又成梟豪傑乘  
時奮賢材早見招紫樞虛上座黃闥待清朝會見擒奸  
操歸來醉小喬恩波門外柳長拂富春潮

壽星將軍十六韻

大將開軍府明旌擁節旄威聲千里震雄畧萬人豪虎

運乘時奮龍星並日高誓將擒趙歇義不事朱滔古法  
傳三陣新書變六韜花門重製鎧大食舊遺刀畫戟終  
依陛彤弓豈在弢銀章分斗印珠鞞上花袍會客春開  
宴傳觴夜伐磬壽筵王母降醴酒穆生逃膾膾薰虵角  
燕支浴鳳毛白麕銜瑞草青鳥送蟠桃豪飲酺三日雄  
牽餼百牢杯深紅瑪瑙酒溢紫蒲萄未祝南山頌時勤  
北府勞雲臺多彩繪好去逐英髦

林塘幽十四韻

勝境愜幽尋芳塘簇茂林漫天驚滉漾拔地見蕭森隔

水時聞磬穿花或聽琴青浮鼈弁小黑直蜃宮深躍藻  
跳珍鯉爭枝墜野禽風回微作籟雲去尙留陰鶴起如  
迎客龍歸若獻琛蘿房依蔭芑寶楫渡迷沈春雨移舟  
坐秋霜倚杖吟豈惟便枕簟莫欲棄冠簪任久將忘世  
觀來已悟心埃塵猶不到榮辱詎能侵天貢朝朝下神  
燈夜夜臨閻浮那有此大士現潮音

贈道士十韻

紅絲牽斗杓白刃斬霓腰雲雨多消散天星盡動搖指  
摧狐女仆目爍蜃郎焦冠碾含髒玉衣裁疊雪綃青螺

晨渡海赤鯉夜迎潮弱水纔容葦蓬萊不用橋暫離金  
母宴又赴木公招石鼎閑聯句瓊樓卧品簫祕書傳寶  
籙名籍掛神霄下士年華促丹爐許借燒

寄何九處士十韻

聞道遷新業濮家原上居連牀棄珍玩囊載束詩書臘  
水春前釀晴泥雨後蔬琴清花院靜棋響竹窓虛紀歷  
忘秦漢徵租絕吏胥浮鷗孤艇棹健犢短轅車綠樹行  
吟罷黃庭坐對餘山林奚必問鐘鼎待何如情已羲皇  
上時方雜霸初觸蠻兩蝸角天地一蘧廬

宿瓜州渡

夜泊瓜州渡。天空客思清。月生滄海白。潮落大江傾。目斷中流楫。心摧去國旌。著鞭吾豈敢。王室正承平。

懷完者禿元帥

勇略經千載。威聲落萬夫。虎紋橫赤頰。犀骨貫霜顱。海盜清旗幟。倭人聳畫圖。鯨鯢今縱恣。風浪滿江湖。

秋日古城

國勢方龍鬪。林居且鶴栖。鼓風秋樹急。接日暮雲齊。江淺沙吞地。山迴石礙溪。日將兵火信。融化作詩題。

寄天香師

圓帽頂紅毳。方袍搭絳紗。海龍邀早飯。山鹿進秋花。試墨探倭紙。尋船鬪建茶。時拋紅豆粒。竹下喚頻伽。

戲贈陳李二萬戶各一首

金虎橫腰重。銀盔壓頸酸。力能擒項籍。氣欲短曹瞞。雅有長城寄。貧無故紙鑽。憑誰奏天子。易爾惠文冠。聞道尊君父。功成丈八鎗。金牌晴射日。白馬夜飛霜。羊肉分軍士。人皮貼戰瘡。箕裘如可紹。不用試三場。

贈西僧

西離五印度東渡獨繩橋海若擎雙足天花上七條胡  
經函貝葉飯鉢繫椰瓢回首流沙路程途十萬遙

菊隱

隱士追陶令黃花托素心或從隣舍飲不厭貴人尋曉  
露三花長秋風五柳深未須天子詔且盡酒家金

挽宣元杰

諱圖沁特穆爾

天下政多故而公乃殞身縱非補天手猶勝望風臣日  
月光雖薄乾坤氣尚新瘦軀如未死撥亂屬何人

挽陳衡之

諱璿

感舊詩千首傷情酒一樽烟塵嗟白晝花月怨黃昏瘦  
馬湖西路輕輿江上邨玉樓雖帝令題著也銷魂

挽徐文卿

諱煥章

七尺虎熊體所傷鬢鬢稀本鍾英氣出竟抱病魂歸土  
壘思排陣風鎚記笑圍空攜掛墳劍無處發長噫

挽李煥章

諱文

飛翼樓前路若耶溪上山雲居期共隱雪艇竟空還邱  
嫂貧何業孤兒長更頑一泓桑瀆水仍透舊柴關

挽張子堅

諱風

文僅典州郡武徒經亂離異書肥白蠹雄劍吼蒼螭身  
冷家人散門荒過客悲忠魂倘為厲猶可捍城危

挽張則正

諱木號小客星又號小桐君  
有觀海集誅魃文行於世

雲外客星落江頭桐樹凋有文誅早魃無祿佐清朝觀  
海聲名大回天志慮銷孀妻與孤子仍舊尾脩脩

挽孫回之

諱明

不躡西湖路秋風幾嘆嗟傷心倚廬樹過眼合歡花別  
業飛龍劍離絃冷鳳琶至今資聖寺猶種故侯瓜

挽馮君祥

諱天瑞

髻亂為昆季烟塵更別離艱難惟爾共忠勇果誰知白  
馬金戈冷紅鸞玉鏡悲燕山萬里外若箇送靈輜

挽楊原中

諱原

習熟夾鎗法軍中作武師兜鍪畫攬陣蹀躞夜交綏敢  
戰惟聞鼓先登每望塵可憐包馬革無處認僵屍

挽程以謙

諱式

草冷駱駝整青燈斂怨魂皇輿春蕩蕩天策夜焯焯望  
泰須從否扶乾在抑坤英雄今不語斯意與誰論

挽趙有道

諱信



學就過人藝不成，昭代功寥寥。千古道寂寂，萬夫雄已矣。龜蛇廟哀哉，虎豹叢余山。西下日無樹，起悲風。

挽張思賢

諱希賢

玉局頻鏖戰，皇墳屢辨疑。似君埋亦少，如我活何爲。海眼填星石，天喉坼斗司。英雄都老去，誰爲輔明時。

燈下有懷

憶昔童婆店，高屯坐夕曛。樹聲呼出月，石角礙回雲。野雉穿花見，清猿隔澗聞。馬頭三四子，曾縛故將軍。

寄贈延慶講臻雲谷

童子扣金鐘，洞天嘶玉龍。天王空裏見，羅漢定中逢。律已兼儒行，蜚聲徹教宗。有時吟未穩，哦遍夕陽松。

聽彈琴

吳生抱綠綺，爲我操春江。洄洑收沙嶼，飛濤濺石砭。岸低風振柁，船靜月窺窓。萬派朝宗意，鍾期信少雙。

送孫伯明教授

白髮桃源長，新恩教越州。丰儀高勝畫，情思淡於秋。春雨羲之屋，涼風賀監舟。遙知足登眺，日與繡衣遊。

答問湖源風土

湖源源上路東與浦陽連地勝藏春塢民居小有天秋  
山紅入畫晴野白浮天一道桃花水如今泊戰船

送海藏王之浙東

浙東多勝地師往幾時還夜雨天童寺春風雁蕩山鳥  
聲花外靜江影渡頭閒去去且隨分無勞雙鬢斑

送范士謙別

勝友早英發懷才人未知聰明管輅易局面賈元棋霜  
月鷄聲早江帆鴈影遲相逢遽相別別後愈相思

簡蔣克政

四海皆龍戰潛夫尚讀書經營宜此始出處定何如樺  
桿雙枝戟偏廂八陣車欲煩徵聘使因便寄吾廬

次韻海石上人書事二首

張侯生冀北關帝出河東勇氣迅雷黑忠肝畏日紅腰  
橫小青劍臂掛大黃弓才力萬人敵惜今無二公  
且視北斗北夜觀東井東截天沴氣白射月大星紅心  
有一寸鐵力微兩石弓世乏段太尉夢懷郭令公

次韻僧文憲書事二首

分省銀章重開邊鐵騎多南搖心似獸西馬項如駝夜

枕眠紅玉春衣繡綠羅營盤方十里不用大風歌  
朱粲糟人少黃巢磨骨多固陵宵遁馬沙苑戰回駝白  
羽裝鞭箭紅銅鑄叵羅兒童齊拍手攔路唱苗歌

聞說

聞說江城破歸心夢裏驚肺肝從此熱手足近來輕春  
事愁花朵晨齋怯鼓聲平生慕王猛今日莫談兵

戎馬

戎馬復四起吾民何得蘇江山雖王氣花柳且皇都竟  
日黃塵暗連年白骨枯王官皆重祿大廈許推扶

寄曾彥魯

大尹久不起吾民何所任挑燈註脈訣閉閣讀官箴舉  
世誰知己逢人卽吐心不如憑玉局長日萬機沈

寄曾文湜

老淚多情思深吟苦寄誰喝盧驚彥道臨帖到羲之小  
席金盤露長圍玉局棋醉眠忘戰伐何物銳頭兒

烏龜嶺草庵

戶納乾坤小山環日月遲瑞雲飛白鶴靈石墮元龜魔  
女能銷睡狙公不濟饑道人貪入定忘却下山時

寄宣元杰王元諒

昔者蘆溝月。曾停十九車。水聲深入地。霜氣倒飛花。路險羸牛乏。泥堅瘦馬癩。槁錢賒不得。拔劍野人家。

悼博羅同知沒於軍

已矣專科學。於今定若何。陣雲寒可掬。兵氣耿相磨。鹿脯祀天乙。蛇神泣太阿。哀哀霹靂棗。偏向死門多。

挽盧處士

月掩少微星。幽人奪壽齡。宋清良可傳。郭泰不慚銘。斷壟荒烟白。新阡野樹青。猶賢玉川叟。有子抱遺經。

簡景初

千里淮吳府。先登得壯侯。馬蹄開鳥陣。虎氣繞蛇矛。春酒花攢帽。秋箏月滿樓。幕賓雖老病。曾識舊風流。

簡王維賢王彥洪

聞道元戎府。風流得二王。紫毫金錯字。白馬水平槍。鴈過蘆洲月。鴉啼楓樹霜。邊情宜少壯。遽肯老頻陽。

次韻許萬戶三首

爲問天台許。誰能洗太陽。旌頭雖弄角。屍氣故生光。山市千峰暗。江城百雉長。獨憐宮省樹。無事起悲涼。

王集卷八  
伯圖紛雜亂元象自昭同茅屋幾風雨孤城又草萊壯  
心驚客雁病眼亂寒梅到處逢旌節誰爲命世才  
文墨老奇士弓旌得偉人尙功惟殺敵祕計肯和親玉  
帳三邊夢金符百戰身猶懷蜀丞相羽扇白綸巾

取青樓夜飲戲葉子肅

酒令傳觴急燈花嚙燭低山人清似水老子醉如泥天  
黑月墮地水寒星在溪猶吹赤蹄紙照道畫樓西

江道翁挽詞三章

自號冬木

相鶴浮邱伯騎驢石曼卿看花歸洞府採藥返蓬瀛劍

影埋金氣丹光隱木精滿空飛羽葆萬里海天清  
天上碧桃熟山中丹藥成茅山朝跨虎弱水夜騎鯨華  
蓋新分座芙蓉舊領城玉棺傳帝令飛去覺身輕  
劫火然冬木先生去就輕法言遺許遜大藥授茅盈龍  
虎低金兆烟霞護玉京惟餘孫與子傳得步虛聲

簡陳照摩

尙憶錢王國車中舊往還肩輿小西市立馬大官山錦  
水明秋日金戈報曉關空漫乞米帖無處破天慳

劉廷璋齋居

玉簪集卷八  
二十五  
穀障秋烟薄。花軒午漏長。傳衣裁白苧。頰弁刃黃楊。散  
帙迎風亂。清樽過雨涼。悠然北窓夢。情思到羲皇。

喜見樓次韻

高樓名喜見。遠客獨傷今。鞍馬思劉備。衣冠惜華歆。曙  
光浮海闊。秋色到江深。送目闌干久。冥鴻入窅沈。

贈吳熙

吳子勇爲義。壯爲金石交。燈前看劍室。花下弭弓梢。春  
雪烏破夢。曉烟麋在庖。不知攘臂者。何事逐黃巢。

代悼亡

漢武黃金屋。何曾貯阿嬌。離鸞春對鏡。孤鳳夜聞簫。事  
往成陳迹。情多賦小招。分香并賣履。此意已蕭蕭。

悼瑞上人死於兵

執手言猶在。回頭事已非。甯知三尺劍。斷送六銖衣。緣  
淺金剛壞。魔深舍利飛。白雲堂上月。還照怨魂歸。

悼義閣黎死於兵

幻劍擊空屍。痛深何足悲。誰知祝髮日。便是斷頭時。綠  
樹懷芳趾。紅英惱夢思。最哀黃髮媪。不葬甯馨兒。

送哲古心往吳江報恩寺

玉簪集卷八  
蘭若壓江橋長廊晝寂寥鳥啼春後樹龍起定中潮花  
雨隨風散茶烟隔竹消客程他日路清話借通宵

題畫

雲寺隱難辨烟江遠莫窮水枯沙出石葉落樹呼風野  
渡秋逾靜漁舟晚尙空尺綃意無限詎讓米南宮

寄周履道

清事何方好荆南溪上山雅懷凌鮑謝好手到張關花  
鳥春風碎雲松白晝閑可憐無與共獨岸小青還

寄蔡漢臣

十四從戎陣先鋒百戰輕休官推李敢敵馬避秦瓊伐  
鼓春開宴銜枚夜突營何年靖淮梗封錦壽春城

留題陳惟允齋居

風雨茅齋夜琴樽清晝時雄談雖邂逅遽別愈相思落  
日鳴孤馬平原卓大旗知君頗豪俊勿後戟門期

分題得吳王井送張德常

鬪地鑿山骨重泉出洞天聲虛響屨步影照捧心妍露  
冷銀牀滑秋空玉鏡圓養民功用在莫問邑頻遷

九日寄許廷佐張景昭

冷落黃花節蕭條白鴈天雄搏鵬九萬鏖戰馬三千鐘  
鼎淹衰鬢山河憶盛年擬呼劉越石同著祖生鞭

次韻許萬戶

虎將有吟癖詩成命僕騷倚牀晨擊劍隔屋夜呼醪落  
日銅駝冷秋江石陣高欲持長脰槩涉海寄敖曹

九月十日同許廷佐吳近仁泛舟松江

沉沉江湖闊蕭蕭廬舍稀晚雲低遠樹秋水淡晴暉大  
野頻鏖戰孤城未解圍何當驅鐵馬北向靖王畿

不醉

不醉揚雄宅甘居許汜牀求田空敗意識字漫成章射  
虎衣裾短屠龍劍鼻長憂貧何日了筋骨豈能強

感古

關內收三傑淮南養八公金成幽血碧龍起瑞雲紅過  
眼王章碎回頭帝業空惟餘白楊樹一類響悲風

聽琵琶

引手作琵琶槽深杪櫂花茶船方到岸鹽客未回家密  
語思何切相尤怨更譁江聲八千里心緒滿天涯

有懷亡弟



白塔寺前路朔風吹軟沙。疊騎黃忽刺側抱紫琵琶。乾  
酪曉衝酒真酥。夜打茶朱容竟何在。雨泪溼黃麻。

虎邱寺

四野天垂幔。孤峯地湧金。潮來講臺潤。日午劍池深。曲  
徑穿紅樹。長廊蔽綠陰。小吳軒子好。誰繼老坡吟。

顧野王讀書堆

昔聞野王宅。今上讀書堆。篁竹最深處。菊花時自開。天  
風響鐘磬。海氣結樓臺。回首梁陳事。悲歌付一杯。

大都卽事六首

平章橋上日光祿。寺前春楊柳。綠垂地。桃花紅照人。粉  
香迷醉袖。草色妬行輪。屠狗悲歌者。空埋泉下塵。  
三月西山道。春風平則門。繡鞍紅叱撥。氈帽黑崑崙。衣  
襟分香裏。壺瓶借火溫。醉歸楊柳月。綠霧掩黃昏。  
小海春如畫。斜街曉賣花。連錢遊子騎。斑竹美人家。襖  
色搖紅段。顰香鬪蠟茶。額黃斜入鬢。側髻半翻鴉。  
楊柳暮鴉啼。鐘樓日又西。小車隨客散。歸馬望塵嘶。碧  
瓦差宮樹。金波溢御堤。時平足行樂。誰問醉如泥。  
紅雪點棉袍。青樓酒價高。朱絲紅紗櫺。玉斗紫葡萄。春

王晉集卷八  
五  
飲行綾卷秋醃割佩刀簾鉤風不定觸損鶻翎毛  
千步廊前月朦朧照御街風簷鳴寶鐸雷板耀金牌城  
影平鋪地樓陰半上堦誰家吹短調一夜亂春懷

東戚少府

浙水險天下驚濤晝夜奔雲雷號海獸風雨走江豚少  
府公田薄鴻儒德望尊聖朝容讜議不用老吳門

聽雪齋

萬籟入沈冥坐深窓戶明微於疎竹上時作碎瓊聲撲  
紙春蟲亂爬沙夜蟹行袁安政無寐欹枕漏三更

東張彥禎知事

臺憲故人老山林幽趣深放船歌落日倚杖聽秋霖架  
有生風簡囊無偵獄金獨賢顧同守不負好儒心

聞鄭國寶往無錫

匹馬抵毘陵重圍百雉城金湯從地湧壁壘亘天橫風  
勁雕弓急霜寒畫角清將軍正閒暇高枕亞夫營

寄馬將軍

馬服古名將孤軍鎮海壖射鵬天雨雪拔槩地飛泉箏  
手調銀甲花奴遞玉鞭虎營燈火夜自註十三篇

贈黃元帥

蕩盡百金產圖成一代名誓天關帝廟劃地呂蒙營峴  
首嗟難鑿江流竟莫清滿懷忠義氣揮作淚縱橫

贈王良佐

雲起碧螺峰賢人出處同絕憐懷道德無處逐英雄使  
者徵王肅諸侯重益公也知囊底智猶足掃江東

寄中山隱講師

問訊山中隱中山第幾重風廊巡夜虎雲鉢聽經龍流  
水千溪月寒巖一樹松無因淨查滓來共上堂鐘

送宋仲溫還姑胥

興盡抱琴歸江空歲暮時孤城天拍水長路雪漫跂日  
月催年事關河起夢思曾藏幾兵甲能壓布帆遲

寄馬都事

職分歸南省軍機重左司欲成錢氏志無出馬家眉大  
府晨趨早嘉猷夜退遲歸來椿館下猶作老萊嬉

簡孫大雅

別後東家子局門只著書但令儲有粟豈問出無車精  
緻追天祿工夫到石渠賓筵干櫓外須爾講關雎

東成元章

共說成夫子詩名逼有唐精神輞川畫風致午橋莊野  
店鷄前月官河鴉後霜雪髯渾未撚七步已成章

贈顏欽若

六合故人散八方多難深青年憂國淚白髮奉親心雨  
屐春苔妒寒氎夜雪侵尤憐乞米帖日向水窓臨

懷趙有道

武功原上路憶爾奮幽尋技巧神機祕經營霸業深幾  
年搔短髮何日遂初心病起寒江暮囊空買藥金

柬顧明府

水國差徭重江城廬舍稀曉星懸印出春雨勸農歸官  
馬哦新月公庭散夕暉欲知通守瘦但視野人肥

寄鍾伯紀

著就春秋傳緘封懶示人共傳懷伯畧獨許作王臣葛  
亮終存漢揚雄漫劇秦憑君瞻才力天下政風塵

寄題錢孟安書房

曲徑蹠平坡危橋跨斷河樹深偷日短閣小借春多酒  
熟妨詩債茶香却睡魔醉心經史內何用說登科

岳飛墓祠

半蓋樹陰圓長廊列從官銀鎗火光現鐵鍊雪花寒二  
帝孤魂散三軍老淚乾獨存秦檜首不挂藁街竿

過杭州雷院留題

急澗水沄沄長松蔽夕曛金鎗飛使者肉翅下天君寶  
殿閑鐘簾瑤緘冷誥文晚來龍取水湖面滾雷雲

題樂靜草堂

古稱仁者靜所樂在居山一鳥不敢語萬松相對閑小  
齋迂逕入深戶襍花關擾擾喧詼子何曾見一斑

簡邵可大

四裔政瓜潰羣雄分蝟張橫磨狂景劔勇恃老儋鎗瘡  
雨銷銅柱天灾火柏梁誰爲股肱郡往取後降王

贈張習之

膏雨晝廉纖爐烟不隔簾燕泥侵玉塵蛛網挂牙籤夜  
枕花頻妬春衫酒半淹綠窻人散後明鏡摘風髯

贈何彥明

芳草綠芊芊南梁二月天綺窻低映戶紅袖蚤登筵化  
日連錢馬輕風罨畫船歸來東閣下時有麗人篇

送暹上人之笠澤

具區三萬頃碧浸楚天深日月循環沒星河徹夜沈寶  
坊開曉甸幽磬隔秋林但恐歸歟後相思無處尋

玉壺清冰室

斗室如蝸殼冲然氣象溫虛含太古雪倒覆洗頭盆色  
相俱難著瑕瑜兩不全誰言鐵如意醉後怯王敦

漁樂圖

昔在山陰任門前是鑒湖晚雲昏島嶼秋水淨菰蒲漁  
艇中流急衡茅倚樹孤歸來拂縑素寫作釣魚圖

次趙伯溫韻

共是越州客同爲莊舄吟潮來鰻井沸龍起鏡湖陰烽  
火臨邊急池塘入夢深蘭亭修禊處無復舊攜琴

梁楷鍾馗

虎口插蛇髭藍蓼鬢脚垂帽裙全破碎袍袖半離披夜  
雨高堂靜秋風耗鬼悲人間多大怪不獨錦棚兒

立仗馬

照夜玉狻猊霜毛鐵鑿蹄春風金絡腦小雨錦障泥御  
駕馳天上軍封受海西日供三品料緘口不聞嘶

二喬圖

竝倚兩含嬌人呼大小喬  
腕鬆紅玉釧釵躡紫金翹  
公瑾應同調孫郎早見招  
獨憐銅雀瓦風雨夜蕭蕭

錢塘逢施孝先

亂裏交遊散信音殊未聞  
海天清夜月江樹早春雲  
到處皆圖霸何人果見真  
相逢惟爾在褶袴亦從軍

奎上人松風閣

兩松依邃閣謾發春音  
夜靜灘聲近秋高雨意深  
石壇鳴落子窻月動清陰  
此際陶宏景幽沈用世心

寄題余山普照寺

塔鎖聰公影墳荒少保隣  
綠苔侵古檜黃葉下高椿  
寶殿秋雲合雲廊月色新  
兩山青遠送長夜賴誰巡

次鍾君來韻

我愛山中好全無俗事牽  
秋霜溪口樹春水渡頭船  
豆熟白鷗聚花開錦雉眠  
官閑僧舍近棋罷又詩篇

九日

客中逢九日心折大刀頭  
草白水沙靜橘紅江樹曉  
風欺破帽落日盼歸舟  
空把陶潛菊長凭王粲樓

次鐵笛道人韻

翠黛鎖眉山濃愁無處安玉環雙鳳叫珠髻九龍盤花  
落夢初斷鶯啼春未闌檀槽兒女語昵昵向誰彈

春登永安寺

宿雨忽開霧凭高散旅愁野烟啼翠鳥庭草卧青牛怪  
石尖於劍長杉高過樓尙懷登絕頂東北望杭州

立夏後一日寫懷

隔樹竹鷄啼夢深懷欲迷玉人方拭淚白馬政頻嘶芳  
履閑花逕塵牽倚繡閨明年還舊約歸醉瑞雲西

懷越

遊子憶山陰秋風自越吟雲從秦望遠城壓鏡湖深笳  
輜常攜酒松梭或載琴遙憐舊童稚久負浴沂心



玉笥集卷八

譚瑩玉生覆校

玉笥集卷九

元 張憲 撰

七言長律

送海一漚十韻

尊者來從乾竺國。畏途生出玉門關。地窮西北河為帶。  
 水盡東南島若環。劫火自如潮勢吼。禪心已似石頭頑。  
 法華雨施金盂水。貝葉經挑錫杖環。幻境萬家飛蝶夢。  
 滄波一箇野鷗閑。染輕龍女花難著。德重天廚食自頒。  
 灑氣秋橫銀色界。白毫夜破鐵圍山。溟溟此日浮杯去。

五言集卷九  
一  
蔥嶺何年隻履還。佛日未應違下國。甘霖直欲遍人間。  
探窮大地蛟蛇窟。歸立穹天虎豹班。

遊黃公洞十八韻

十月山城氣候偏。黃公洞裏看春妍。五紋鶻雀嬌疑鳳。  
千葉蟠桃大似蓮。巨彈落星天狗碎。神斧出土佛牙堅。  
雜花冉冉張紅錦。芳草茸茸卧綠氈。厓瀉蜂腰橫斷杵。  
巖撐虎口抱空拳。卷澗邊野雉如人立。松下馴麕傍母眠。  
峰隱金雞啼曉月。瀑翻銀漢下長天。十圍龍竹高逾樹。  
五頂神芝秀結拳。蘇壁冷雲封鬼谷。寶函金穴祕神淵。

枰遺商皓棋三角。劍缺黃巢石半邊。丹火有人留蛻骨。  
玉棺畿度葬神仙。扶危鐵柱長存蹟。代步花輿不下肩。  
世隔衲僧方廣地。路迷漁父武陵船。華陽未老陶宏景。  
勾漏先歸葛稚川。記慙何嘗知晉魏。流光端可繼彭錢。  
蓬萊方丈圖中見。流水胡麻世上傳。欲報穀城山下礦。  
已無圯上袖中編。便當導引師吾祖。深避衡茅一萬年。

送何山長十韻

黃岡義學何人建。山長新除甚日行。禮樂三千開治道。  
風雲九萬始修程。絃歌此去培英雋。俎豆由來得老成。

齊舍諸生師郭泰橋門萬眾羨桓榮干戈久弛衣裳會  
豪傑思趨月旦評靜考義圖細大衍博評麟史議齊盟  
壺觴日永歌魚麗琴瑟春深和鹿鳴豈但雅情違世務  
終知雄畧在經營元黃未解乾坤戰薄食徒傷日月明  
珍重斯文膺至寄可能坐待泰階平

寄宣參謀十四韻

輕裘緩帶晉羊公羽扇綸巾蜀臥龍霸府規模談塵裏  
神州形勢畫圖中文章藻飾冰霜操戈甲森羅錦繡曾  
掌上風雲開八陣指端神煞祕諸宮廟謀素抱留侯略

雅量真成謝傅容鹿角砦深嚴木柝虎皮韉暖覆花驄  
據鞍橫槩心何壯賭墅圍棋興政濃湖面鼓聲催落日  
原頭旗影動秋風蕭蕭歸馬荒陵樹慘慘昏鴉夜寺鐘  
偏伍暗分元武旆牀機潛發鳳凰弓燈前玉女趨符令  
月下金神守劍鋒幕客坐均三品食健兒立侍萬夫雄  
屠龍占技嗟先識捫蝨奇論惜未逢好在勇爲天下事  
扁舟歸卧五湖東

七言律

井西丹房

葛井西頭更向西。丹房高與白雲齊。鉛田虎下飛紅電。  
汞海龍沈結紫泥。山鬼俯欄窺火候。爐神伏地丐刀圭。  
飲餘一盞中黃酒。坐聽鶉聲松上啼。

觀習鄉兵

吳班馮習兩都頭。十里山城據上流。錦帳月明張夜宴。  
繡旗風暖試春蒐。裹瘡廣樂猶堪戰。垂翅回溪未足憂。  
天子念功思將帥。南宮聞已構層樓。

題院人畫小景

高棟層軒夜未央。溶溶新綠漲池塘。風輕楊柳金絲軟。  
月淡梨花玉骨香。亂唾碧茸紆曲逕。獨循青鎖轉迴廊。  
千金一刻誰能買。輸與豪家白面郎。

受上人房簪芍藥花

金縷盃安瑪瑙盤。花神爲我獻清歡。都將東武伽藍會。  
直作維揚宰相看。兩坐春風嬌拂座。一壺美酒醉凭闌。  
從教夾道吳兒笑。贏得烏紗玉露溥。

對牡丹有所贈

塵滿堯夫小步車。東風幾度負韶華。蜀人自適琴中調。  
吳女徒歌陌上花。半裏牛酥和夢寄。一腔羯鼓共誰搗。

玉簪集卷九  
四  
金刀剪斷雙頭錦。羅帽簷嬌壓欲斜。

寄周畫史

花竹翎毛滿近郊。可憐畫手日蕭條。鳩聲未絕春常雨。  
鷗影不移江白潮。魏武門風今作庶。梁家奴態動成謠。  
王淵獻頌俱無信。誰寫先生五柳橋。

雪篷

十年南雪不沾沙。獨爾孤篷載六花。路人溪山天一色。  
雲同湖海玉無瑕。瓊田預借收冰榜。銀漢驚飛貫月槎。  
我是寒江蓑笠叟。凍吟真敢繼劉叉。

席上得搖字

翠館行廚雪乍消。牆頭新柳又垂條。珊瑚枕暖人初醉。  
鸚鵡籠寒舌未調。座上綵鸞珠插鬢。掌中飛燕玉圍腰。  
海棠一夜東風軟。落盡雲邊金步搖。

嬉春

春來何處惱柔腸。柳下人家綠鎖窗。畫棟歌塵珠菽菽。  
雕盤舞袖翠雙雙。鼓翻芍藥雷轟座。酒熟醱醱雪滿缸。  
最憶瑤芝堂下路。一宵歸夢隔春江。

贈張師

馬似游龍掣似蛇。弁登雄雉服登猊。聲吞漢賊當陽坂。氣壓秦皇博浪沙。蔽日浮雲行按劍。滿天明月卧吹笳。同宗亦有狂書客。坐對寒窗擬禡牙。

題僧智果書梁武評書帖

三十四賢三百年。能書端有幾人傳。藝高梁武評都盡。筆到隋僧法度全。逸少雄強難繼踵。元常茂密孰齊肩。摩挲斷石思存古。起倚西風一慨然。

與甯子廉馬敬常飲酒得移字

我愛中州雙國士。尊前為我解金龜。南山石爛歌逾緩。

隋  
不平  
四支  
平聲

銅柱沙沈跡未移。割土有人窺漢鼎。磨崖無客頌唐碑。狂生雅抱澄清志。中夜聞雞起舞時。

送海上人從軍

閩黎不肯著袈裟。要斬人頭換白麻。天道近來增壁壘。火星昨夜入匏瓜。山城暮雨閑弓劍。沙塞秋風送鼓笳。縱不黃金銷韎韐。也勝紫繡踏麻靴。

讀戰國策

雞連六國歎從人。蠶食諸侯笑暴秦。上黨禍階朝作厲。長平戰血夜生燐。苟全田建松間命。甯恤燕丹劍下身。

王等集卷九  
北  
抖盡祖龍囊底智。咸陽回首亦成塵。

春日寄賽將軍

雨後教場春草青。一鞭飛馬似流星。畫旗展綵明金字。  
花箭翻香落粉翎。虎豹韜鈴新戰陣。麒麟閣閣舊儀型。  
霸吳平楚男兒事。早立奇勳待我銘。

柬衛處士

傍山依水作幽居。未減南陽諸葛廬。卓行自成高士傳。  
浮榮不用辟書除。烏絲小楮春題畫。青簡長編夜著書。  
愧我紅塵走官馬。計偕空詣漢公車。

詠櫻桃

海西四月櫻桃熟。曾醉吳郎珠樹叢。梗落金刀紅玉潤。  
彩搖華月赤瑛空。香脣每笑歌姬淡。小字深憐妒妾同。  
客裏薦新家廟遠。聖恩只憶大明宮。

題衛王畫

拄天直壁插山椒。拍挾晴空老氣驕。蒼隼沒雲猶可望。  
野烟著水未全消。樓臺落日秋蕭索。林麓西風晚寂寥。  
安得樂郊真似畫。日扶藜杖上溪橋。

大都書所見

桃皮虜策響秋空。鵝項琵琶奏晚風。西馬長腰馱赤豹。  
北駝穹背掛元熊。太平有象歸文德。大獵無忘示武功。  
赫赫帥臣專獮狩。聖恩聞已賜彤弓。

元會

天眷聖明開大業。班分文武列賢寮。股肱元首歌虞舜。  
富壽多男祝帝堯。萬國山河歸正統。百王禮樂聚清朝。  
瓊樓玉殿攢金闕。紫霧紅光隔絳霄。

白塔寺

紺殿瑤臺列梵區。舞鸞翔鳳繞階除。黃金飛出梅檀像。  
白馬馱來貝葉書。七寶浮屠珠結繖。五龍交椅玉爲輿。  
法音一派鈞天起。萬籟聲高振碧虛。

登齊政樓

層樓拱立夾通衢。鼓奏鐘鳴壯帝畿。萬古晨昏常對待。  
兩丸日月自雙飛。壽山樹色籠佳氣。御水波光蕩落暉。  
手把闌干頻北望。心如征鴈獨南歸。

渡江懷宣元杰

北固山前春水生。瓜州渡頭人不行。火殃夜落金山寺。  
海氣朝吞鐵甕城。萬古不磨青嶂老。六朝都逐大江傾。



王晉集卷九  
伯符公瑾今何在。狼石雄談最憶卿。

春日

彩毫漆點新蟬翼。奚墨雲磨舊馬肝。月落小窗瓊佩冷。  
夢回孤枕玉釵寒。茶蘼架雪香生宴。么鳳籠烟醉倚闌。  
笑我一春長閉戶。柳花填巷卧袁安。

賦松江漁者

短棹輕舟白髮翁。往來常在泖西東。一篙綠水孤篷外。  
九點青山落照中。不盡春光楊柳雨。無邊秋興蓼花風。  
鷓夷盛酒羊裘卧。表海封齊莫論功。

早春

二月葑門河水新。落花芳草暗平津。綵雲不作青樓夢。  
黃鳥空鳴綠樹春。風暖畫旗開甲第。日斜歸馬趁行輪。  
紛紛冠蓋埃塵裏。誰問城東樹屋人。

悼惠師

八十一年塵夢醒。佛臺歸座九蓮青。金銀氣斂心無礙。  
衣鉢囊空性始靈。舍利自飛阿育塔。茶毘不損貝多經。  
春風草草新阡下。日有門徒打墓銘。

贈軒轅道士

子是彌明幾代孫。姓名乃使世間聞。坐驚星斗生雷劍。動使烟霞繞練裙。月裏白鸞招子晉。山前青虎借茅君。長春酒熟朝朝醉。高枕瑤琴卧碧雲。

王氏小桃源

一簇林塘隱者栖。天然畫出武陵溪。循牆流水灣灣曲。匝屋桃花樹樹低。春雨閉門山犬吠。炊烟隔竹午雞啼。幽深直待秦人避。但恐漁郎自路迷。

題宋仲溫墨蹟

江南羽化張天雨。海上神交宋仲溫。楷法鍾繇稱獨步。

草臨皇象已專門。折釵未墜風前髮。屋漏先垂雨後痕。寄謝墨池諸俊彥。虬蛇雞鶩莫須論。

留別賽景初

暖雲將雨驟陰晴。四月羅衣尙未成。萬點愁心飛絮影。五更殘夢賣花聲。方空越白承恩厚。繡襦諸干照道明。自笑窮途不歸去。空懷漫刺闔閭城。

蘭棘圖

山果羅生何瑣細。幽蘭叢雜愈馨香。寒根壓石垂垂瘦。惡棘侵蹊故故長。甘苦所需同雨露。萌芽餘幾更牛羊。

撫圖未用增嗟唏。且復呼兒進一觴。

送賽將軍入吳興收集故業

暫歇將軍帳下驄。樓船西入水晶宮。集賢書畫干戈外。  
公子田園簿籍中。天目諸山皆走北。太湖萬頃獨朝東。  
不堪重舉新亭歎。地下前王淚血紅。

謝惠墨

南唐五李久絕跡。老潘入井法不傳。太史鴻文今有價。  
故家豹橐定誰捐。篆成屈玉雙釵並。詩寫聯珠九曲穿。  
直待枋頭修史了。却須佳傳贈陳元。

臨安軍前

寂歷荒城遍野蒿。昔人事業已徒勞。雁將秋色催歸馬。  
楓引霜花入戰袍。地阻東南鄉信遠。天昏西北陣雲高。  
不堪屢作還家夢。起向西風撫大刀。

畫馬

臆間鱗甲隱龍紋。前立啼雞後犬蹲。天仗威儀猶想見。  
江都法度尙生存。廢官自寵王毛仲。部校誰奇賀六渾。  
幾度夜深瞻象緯。可憐房宿至今昏。

王師討徐

相臣虎拜別龍顏。廟算神機指日還。大選五兵開武庫。  
長驅萬馬下天閑。投鞭足竭長河水。磨刃能平九里山。  
爲報龐勛先授首。黃樓土色夜來殷。

次葉秀才韻

丈夫有淚濯氛埃。莫作尋常兒女哀。帝室河山初不改。  
令公幙府幾時開。仰瞻北斗低金闕。遙望中天近玉臺。  
安得吳兒八千騎。爲君縛取衛王來。

黃大癡畫

樹裏人家似輞川。塢中草木類平泉。下方官府自徵稅。  
何處漁郎來繫船。百折澄溪東走海。萬尋直壁上摩天。  
筆端點點皆清氣。誰道癡翁不解仙。

書憤

離宮金翠化爲烟。土宇凋零舊幅員。豈是相君酣醉日。  
况逢天子中興年。武關兵馬全無信。浯水文章久未鐫。  
白髮詩翁憂帝室。長歌泣血拜啼鵑。

良宵

良宵情緒不堪題。立遍闌干意欲迷。鐵撥忽敲壺口破。  
金刀頓翦燭心齊。綠分楊柳湘簾細。紅壓櫻桃斗帳低。

彷彿第三橋畔宿。月明珠樹夜烏啼。

次韻江鍊師

道人容貌似嬰孩。手抉天罡步斗魁。拄杖神遊却月觀。  
渡風夜上鍊丹臺。劍橫秋水蒼龍化。衣染春雲玉女裁。  
聞道蓬萊隔東海。芙蓉三朶翠成堆。

次韻孫埴

十年戎馬動成羣。勢比連雞未解紛。天狗星流聲震地。  
蚩尤旗卷氣垂雲。仆碑誰讀平淮頌。誑鬼人傳詛楚文。  
安得爾家賢討虜。雄談狼石坐宵分。

花洞

花洞花開雲錦鋪。看花遊女白如荼。素羅便面歌紅拂。  
紫障采眉舞綠珠。楊柳露乾方作態。海棠春困未全蘇。  
畫船來往仙潭闊。人在銷金十里湖。

李遵道枯木

葉蠹心枯勢欲僵。火焚雷翦類空桑。強扶朽質排元氣。  
力挽旁枝障太陽。鬼狀虺隤生意少。龍鱗剝落本根傷。  
薊邱深意吾知得。珍重君王別棟梁。

次韻贈張省史從軍南征

玉筍集卷九  
震天金鼓紫駝驕。阜纛連珠畫斗杓。甲馬魚鱗開曉日。  
錦袍花萼上春潮。枕椰雨暗湯泉溢。茉莉風暄海瘴消。  
幕下何人專草檄。共誇謀議得張昭。

玉筍集卷九

譚瑩玉生覆校

玉筍集卷十

元 張憲 撰

五言絕句

次韻虞閣老題柯丹邱畫

夜雨幽篁密。晨霜落木多。月明商女恨。江冷越人歌。

天馬二首

蕃方皆貢馬。聖意本求書。縱使行千里。終當駕鼓車。  
今代佛郎國。龍媒進上都。後斯能作頌。周朗善爲圖。

董羽卧沙龍

三管集卷一  
仰閣青牛首橫。搯赤鯉腮。輕雷驚不起。直待早潮來。

宮廊雪霽圖

樹影上階除。宮廊雪霽初。門前有鹹草。倚柱待羊車。

官怨

寶索懸珠珮。霜花上玉墀。井桐紅似錦。不寫御溝詩。

畫扇

萬木落秋風。雙柑氣勢雄。嶙峋一卷石。留取補天空。

陸垣畫

山果綴丹實。霜林開畫屏。美人湘水上。誰與拾秋馨。

醉歸

五柳低垂地。孤松俯壓檐。門生舁竹轎。往取醉陶潛。

士女圖

孔雀當階舞。芙蓉夾路生。玉人誰作伴。相對坐調笙。

葡萄

天上金盤露。人間玉樹秋。長卿消渴久。明日再扶頭。

竹石

春來不肯晴。綠苔遍頑石。曉起看新梢。一夜高一尺。

柯丹邱枯木竹石圖

粲粲翡翠釵。慙慙珊瑚樹。露涼蘿月高。湘魂不知處。

梁楷鬼

既竊甯王笛。又盜妃子扇。雖曰情狀深。終爲端士見。

桂花便面

冷露下山阿。寒光溼秋宇。天香鏡中來。照見嫦娥語。

畫竹

涼風徐徐來。六月靜如水。但恐瀟湘姿。不堪美人倚。

秋棠

秋棠類春櫻。粲粲耀緋綠。可憐竹與蘭。零落在空谷。

畫扇

渴龍飲清江。江水皆倒立。風雨滿山來。石楠半身溼。

溫日觀葡萄

銀囊懸紫駝。驛騎曉來急。西風吹竹窻。一夜鮫人泣。

盛子昭畫

秋樹半著霜。水落石嶮嶮。寄謝清渭翁。釣得營邱否。

八仙花

手折八仙花。贈余十日別。春光不待人。歸來已成雪。

六言絕句



採桑圖

道旁人畫秋胡桑間誰是羅敷莫戀懷中金餅倚門家  
有嚴姑

瘦馬圖

神駿豈在澤毛力強不妨少肉仗前無限豐駒徒糜君  
王芻粟

湖上二首

綠蓋遮籠菡萏碧欄搖蕩鴛鴦罨畫船中鼓板銷金鍋  
裏時光

紅杏牆頭粉蝶綠楊窗外黃鸝何處春光最好踏青人  
在蘇隄

夜月

夜月小樓簞策東風深院琵琶料理宿醒未了春光又  
在隣家

冠蓋

冠蓋花間玉驄綺羅簾下香風一體傷春病酒奈何轉  
眼西風

問鵲

寒食清明已過牡丹芍藥將開爲問簷前喜鵲遠人何  
日歸來

楊妃睡起圖

琥珀椀空荔子龍香撥冷琵琶問道三郎何在今朝早  
仗南衙

自歎

臺閣荒涼鼎鐘家山孤負雲松徧地烟塵豹虎何年雷  
雨蛟龍

宮體

綺疏面面玲瓏衝牙步步丁東金尾屏風孔雀銀牌絲  
線梧桐

早春湖上

玉驄草軟平田油幕風輕畫船燕子釵頭春勝梨花院  
裏秋千

軍士

黃犢草肥易牧雕弓雪冷難彎比似馬鞍作枕何如牛  
背看山

陶淵明

三言集卷十  
五  
二頃半田種秫八十餘日居官稍帶收成解印也教妻  
子心寬

題畫

遠岫層層何處矮房簇簇誰家烟樹夕陽歸鳥清溪古  
渡橫槎

寄王祖孝

許昌城中種菜宏農道上騎牛笑我兩宵翦燭憐君月  
夜凭樓

漁翁圖

細雨斜風簌簌淡烟殘月篷窗意足半篙春水夢回一

枕秋江

七言絕句

秋夜書所見

大星殞地聲動屋明月入樓光滿牀起看北斗正半夜  
白氣繞城如女牆

長蘆鎮書客况

旋風捲簾楹挂天長河斷流冰膠船擬隨富翁同守凍  
只有一句沽酒錢

聽松圖

洪厓羽士斃衣輕脚踏青鸞下玉京直壁倒懸秋萬尺  
盤陀石上聽松聲

早春寄雅宜山人

天平東下瞰靈巖一派雲巒黑萬杉鶯燕未來花柳瘦  
欲於何處試春衫

贈菊田道人

秋雨開田四十雙陶家舊徑遂成荒中年眼角方如口  
始信菊花滋味長

酈生長揖圖二首

淮南黥王乃可傲高陽酒徒何必輕駕馭英雄須有術  
不宜如此見書生  
踞牀洗足非爲慢長揖軍門也不多大抵英雄皆坦率  
子陽罄折竟如何

許將軍郊居

東青門東草地平曉來濃霜如雪明細弓膠勁不須焙  
手撚髀頭尋雁聲

簡竇彥南

二十四橋風月清  
瓊花觀裏坐吹笙  
金盤露冷凝脂滑  
一夜新霜睡不成

赤壁圖

白露橫江山月小  
柔櫓啞啞聲渺渺  
船尾一聲吹洞簫  
回首黃州天已曉

竹蝶圖

落盡春紅春夢熟  
平沙小院窓中綠  
美人睡起背東風  
蛺蝶飛來上修竹

子陵獨釣圖

天上故人赤伏符  
羊裘大澤隱狂奴  
絕憐一線桐江月  
不換當年諫大夫

佘山道中

老樹排雲石徑斜  
炊烟起處有人家  
一聲啼鳥春成夏  
新綠滿汀浮柳花

脊鴿圖

曉來霜重蒹葭溼  
枯楊颯颯西風急  
鄰家兄弟政鬪爭  
不見脊鴿原上立

吳仲圭畫荔枝障

知味何人似蔡襄方紅陳紫與誰嘗七閩塵障南來使  
賜斷薰風十八娘

弔寶維賢參政

紫團犀跨新公服鐵馬金戈舊戰場倘使僵尸包馬革  
也勝廟食水仙王

鐵笛道人遺筆策七絕

朔客有以筆策遺道人者  
道人以送余且將以詩仍  
率五溪馮溥錦泉馮文和以成什余慙愧無李龜  
年之藝而虛得張承吉之名也既次第來韻復賦  
此答美意且邀李  
桐屋僧守仁同賦

贊皇太尉有新題不減吳江與會稽最憶秋山霜月夜

卷蘆一曲醉如泥

朔客蒼頭一尺髭酒酣氣熱卷蘆吹花娘不展徘徊拜  
虛負王孫五字詩

長安城裏紫葡萄關塞遺聲透月高一十八星清竅冷  
無人喚起薛陽陶

南徐江上月黃昏誰嚼寒爐對酒樽滿耳胡風全不競  
空煩公主嫁烏孫

漢家鹵簿最多儀夾駕雙弧武騎隨不似酒邊呼李袞  
靜攜九漏月中吹

王晉集卷一  
一曲邊聲繞月樓。滿天兵氣似并州。塞鴻不管關山怨，閒却吹螺小比邱。  
國手傳聞張野狐。清歌最善月中蘆。風前靜洗箏篴耳，別畫明皇按舞圖。

冬至古城簡楊馮二先生二首

徧地妖氛起砲車。十年戎馬未甯居。瑞雲一朵壺中境，留作先生魯觀書。  
昨夜三更雨似酥。新陽地底動葭莩。憑誰蚤起書雲物，梓慎曾爲魯大夫。

留別盛經歷

重關複道固高深。戰勝尤宜苦用心。莫倚昔曾擒李密，賊徒今不走桃林。

方頤

方頤大口玉顏紅。七尺長身猛似熊。偏得將軍傳武藝，闊街飛馬背開弓。

題畫

晴川渺渺停春水。怪石峩峩插亂山。最愛夕陽烟寺裏，千株古木一僧閑。

三言集卷十  
一  
釣魚圖

水痕新落露灘沙。葉葉丹楓映晚霞。六尺釣竿三尺線。  
先生意不在魚蝦。

趙集賢枯木竹石

槎牙老樹響天風。寂歷幽篁泣露叢。惆悵玉堂舊公子。  
故家陵廟月明中。

戲歌兒

閉門落籍丁文椀。教子讀書隨意歌。湖上水雲樓上月。  
如今贏得夢魂多。

達實巴圖爾平章復許州

狡計爭功笑子都。登城不在奪盔弧。少留天使須臾飯。  
坐看將軍入許鄆。

贈日者

玉節旌旗照帥符。虎爭龍鬪正吞屠。煩君勇啟談天口。  
說破當今推祕圖。

贈僧聲無像

蚩尤天狗正狺狺。五緯紛紛起鬪爭。一點圓靈無認處。  
六符誰問泰階平。



西窗三首

西窗大樹遮夕陽南樓小溪生晚涼青天無雲鳥飛絕  
白蘋起風蟬噪長  
寒瓜激齒冰雪香白石枕頭魂夢長枇杷葉大暑光薄  
梧桐生子秋意涼  
赤日欲落又未落清風忽來又不來溪邊屬玉成對立  
水上藕花相閒開

玉笥集卷十

譚瑩玉生覆校

右玉笥集十卷元張憲撰案憲字思廉山陰人家玉笥  
山因以爲號仕張仕誠爲樞密院都事吳平後變姓名  
走杭州寄食報國寺以死明史文苑傳附載陶宗儀傳  
末考朱竹垞靜志居詩話稱宗儀入明自署其居爲小  
栗里雖好爵未縻而集中如乙卯人日紀行入都門早  
朝聞皇太孫卽位等詩可以不作可以不作而作之宜  
錄入明詩矣玉笥集固無之也其心迹殆迴不侔矣  
四庫提要已著錄稱卷首有楊維禎周砥戴良及安成  
劉鈺四序又孫大雅玉笥生傳及楊基玉笥生傳書後

三言集跋  
各一篇而此鈔本俱佚之僅存劉鈺一序顧俠君元詩  
選稱思廉師事楊康夫尤多懷古感時之作劉鈺一序  
可稱知己又靜志居詩話稱鐵崖弟子才鋒犀利莫過  
張思廉讀其長歌波瀾橫溢弟子不必不如師也錄其  
詩於明詩編外臣卷內多至三十二首所以推挹之者  
亦至其風骨實迥異於可閑老人也乃可閑嘗策張仕  
誠之必敗嘗作詩刺之云一陣東風一陣寒芭蕉長過  
石闌干只消幾箇曹騰醉看得春光到牡丹思廉豈不  
如其明哲閱其詩悲憤無端顧竟不能自拔亦可哀已

詩於七言古外復分歌吟長短句諸名目微嫌破碎以  
原本如是卽仍之咸豐辛亥穀雨令節南海伍崇曜謹  
跋

潞水客談

潞水客談

貴溪徐貞明著

徐子徵入諫垣首疏西北水利事水衡當事者迂其言置不省徐子乃撫膺歎曰當今經國之計孰有大且急於西北水利者乎惟槩而言之則效遠而難臻驟而行之則事駭而未信蓋西北皆可行也盍先之於畿輔畿輔水利皆可行也盍先之於京東永平之地京東永平之地皆可行也盍先之於山瀕海之地山瀕海之地皆可行也盍先之數井以示可行之端則效近而易臻

事狹而人信又恐其難於遙度也則又裹糧屬二三解  
事者走永平瀕海近山之境相度而經畧之既得其水  
土之宜疆理之詳始信其事之必可行而猶冀其言之  
獲售也欲再疏以請草具將上適以他事免官卒不獲  
一試客有問徐子者曰余聞天下事諫官皆得言之今  
天子銳意化理卽水利報罷豈無他事可言者而顧鯁  
鯁焉惟冀此議之再行且謂今日之計無大於此者何  
歟徐子曰客亦聞古聖賢之治天下乎禹功茂矣而濬  
澮距川乃其盡力而終身者騶孟談王道惟是田里樹

畜厥惟先務客何於水利而易視之余請爲客悉其說  
夫雨暘在天而時其宣洩用以待旱潦者人也西北之  
地旱則赤地千里潦則洪流萬頃惟寄命於天以幸一  
歲之豐收夫豐歲豈可常恃哉此其宜急者一也神京  
北峙而財賦全仰於東南之漕謀國者鑒勝國之遺事  
懷杞人之隱憂夫中人之治家必有附居常稔之田始  
可安土而無饑乃國家據全勝之勢居上游以控六合  
而顧近廢可耕之田遠資難繼之餉豈長久萬全計哉  
今者早運而久積之儲蓄信有賴矣然運早而收之不

及其熟有涸損之患久積而發之恆過其期有紅腐之  
憂其宜急者二也東南轉輸每以數石而致一石民力  
竭矣而國之大計亦未能暫紓也惟西北有一石之入  
則東南省數石之輸所入漸富則所省漸多始則改折  
之法可行久則蠲租之旨可下東南民力庶幾再甦其  
利三也昔禹播九河入於海而溝洫尤其盡力固以利  
民亦以分殺支流使不助河爲虐也周定王後溝洫漸  
廢而河患遂日甚今河自關中以入中原涇渭漆沮汾  
泌伊洛灋澗及丹沁諸川數千里之水當夏秋霖潦之

時無一溝一澮可以停注於是曠野橫流盡入諸川諸  
川又會入於河流則河流安得不盛其勢旣盛則其性  
愈悍急而難治今誠自沿河諸郡邑訪求古人故渠廢  
堰師其意不泥其迹疏爲溝澮引納支流使霖潦不致  
汎濫於諸川則並河居民得資水成田而河流亦殺河  
患可弭矣其利四也古之建國分土者必曰我疆我理  
南東其畝而晉之邀齊欲使盡東其畝以便戎車是則  
井田溝洫旣以闢土而宜民亦以設險而禦侮也今則  
西北平原千里寇騎長驅無有阻隔若使溝洫盡舉豈

有此患而且田閒各植榆棗桑粟既可資民用亦可以設伏而避敵其利五也往者劉六劉七之亂持竿一呼從者數萬則游惰歸之也蓋惟四民農必土著可以縻其身家惟土曠而民游則輕去其鄉而易於爲亂誠使西北水利興則人皆可安土何至有流賊之患其利六也東南生齒日繁每人浮於地乃西北蓬蒿之野常患疾耕而不能徧蘇子所謂聚則爭於不足之地散則棄於有餘之鄉其不均每如此也今若招撫南人使脩水利以耕西北之田則民均而田亦均矣其利七也東南

多漏役之民而西北罹重繇之苦則以南之賦繁而役減北之賦省而繇重也使田墾而民聚民聚而賦增則北繇可輕其利八也沿邊諸境有轉輸不能至者招商以代輸蓋有數頃之田困於一商遂棄業以他徙其有轉徙之苦者則私以折色兌軍商得苟安軍無宿儲卽承平勿論設有烽警何以待之惟近邊田墾轉輸不勞其利九也屯田之成熟者多屬隱占久則難稽然亦不必稽也西北非無田之爲患而不墾之爲患彼旣墾而熟矣何必歸官始爲國家之利哉兵之悍壯者恥於負

鋤而其羸弱者又怯於荷戈驅兵爲農勢固難行惟募之爲農簡之爲兵則心安而力奮也政無不舉矣今天下浮戶依富家以爲佃客者何限募而集之可立致也募農以脩水利以舉屯田其利十也塞上之卒土著者少不得已而有募軍則居行給餉爲費不貲又不得已而有班軍則春秋遞往疲於奔命又不得已而有按籍句補解檄方登逃亡旋報閭閻重困行伍又虛若近塞水利旣脩屯政大舉田墾而人聚人聚而穀足可以省遠募之費可以蘇班軍之苦可以停句補之煩其利十

有一也宗祿勢將難繼咸切憂之而莫肯任其議將以難遺後人而後之難將有甚於今者世有勇於建議者則曰裁其祿弛其禁而已夫不資之以謀生而徒裁且弛之則饑寒者孰恤昔范文正以兩府祿入尙能廣義田以廩族人以四海之富而不能使天潢皆獲安飽在聖天子展親睦族之仁必不忍其至此誠卽西北曠土擇人所棄者官爲墾闢分井而田如中尉以下量歲祿之意授田若干使得安居而食其土其後支庶漸繁田不再授彼既有田以開其治生之端復知田不再授則



皆及其始授之時勤儉明農於其閒以歲食之餘漸墾田擴產以爲長子孫之計則其才智者固可以致富卽庸拙者亦可以服田力穡其與坐食多餒散處失所者相去遠矣其利十有二也昔之有志者嘗欲做井田之遺意授民之產而惜其時之不可痛豪強之兼井欲限民之田而恨其勢之難行今若於西北空閒之地脩舉水利做古井田可也限民名田亦可也古昔養民之政可以漸舉其利十有三也古者以井畫地度地居民比閭族黨井自爲界民不可多得尺寸之地者民與地適

相均也今通都大邑之民踵接肩摩爭習繁靡以梗化而敗俗其爭少而習樸者惟寥廓之鄉爲然今若畫井居民哀多益寡使民與地均如古比閭族黨之意則教化可興俗尙自美其利十有四也客曰信如子言水之利溥矣西北皆可行而獨先於京東者何居徐子曰京東者輔郡而薊又重鎮矧其地負山控海負山則泉深而土澤控海則潮淤而壤沃興水利尤易易也予所屬一二解事者蓋徧歷山海之境閱兩月而返披圖出示如指諸掌也爲言諸州邑泉從地湧一決而通水與田

平一引而至比比皆然姑摘其土膏腴而人曠棄即可  
脩舉以肇其端者自西歷東如密雲縣之燕樂莊平谷  
縣之水峪寺及龍家務莊三河縣之唐會莊順慶屯皆  
其著者也薊州城北則有黃厓營城西則有白馬泉鎮  
國莊城東則有馬伸橋夾林河而下城南則有別山鋪  
夾陰流河而下至於陰流淀疏渠皆田也遵化西南平  
安城夾運河而下及沙河鋪地方又鐵廠湧珠湖以下  
至韭菜溝上素河下素河百餘里夾河皆可成田遷安  
縣北徐流營山下湧出五泉合流入桃林河又三里橋

湧泉流出灤河又蠶姑廟湧出泉成河與灤河相接夾  
河皆可田之地盧龍縣燕河營湧泉成河及營東五泉  
漫湧四出至張家莊撫甯縣西臺頭營河流亦自燕河  
營湧泉而來皆可田自西以東如豐潤縣南則大寨及  
刺榆坨史家河大王莊之地東則榛子鎮西則鴉鴻橋  
夾河五十餘里皆可田玉田縣清莊塢導河可田後湖  
莊疏湖可田三里屯及大泉小泉引泉可田其間有民  
所不業之地有屯田有牧馬草地屯草之地屬於官官  
爲闢其蕪而收其利不難也至於民不業者召民業之

官爲助其力何至連阡以棄鞠爲茂草乎至於瀕海可  
田則自水道沽關黑崖子墩起至開平衛南宋家營之  
地東西度之百餘里南北度之百八十里皆隸豐潤其  
地與吳越瀕海之沃區相等今萑葦彌望而悉據爲勢  
家之產然葦之利微卽勢族亦無厚利於其閒也若如  
吳越耕之則利十倍於葦卽捐其一以與勢族使不失  
其舊入勢家亦何恨焉昔虞文靖公之議東極遼海南  
濱青徐瀕海皆可田之地今豐潤實其中欲舉其議而  
行之茲非其先當致力者乎蓋先之數處以兆其端而

京東之地皆可漸而行也先之京東而畿內列郡皆可  
漸而行也先之畿內列郡而西北之地皆可漸而行也  
在邊陲則先之薊鎮而諸鎮皆可漸而行也至於瀕海  
則先之豐潤而遼海以東青徐以南皆可漸而行也夫  
事有小用之則宜大則拘而不適大用之則宜小則窘  
而難布茲其試之一井究之天下無不利者事有旦夕  
計功而遠猷不存積久考成而近效難覩茲其暫之歲  
收久之永賴無不利者特始之京東數處因而推之西  
北二歲開其始十年究其成而萬世席其利矣乃西北

湖九各言  
之人方苦於水害而不知水利夫水之在天壤間本以  
利人非以害之也聚之則害散之則利棄之則害收之  
則利如血之在人身流貫於四肢而潤澤其肌膚一有  
壅則上爲癰下爲痔又或溢出口鼻則戕其軀而以咎  
血之爲害也可乎古者耕耨必於井田其制剛達於溝  
溝達於洫洫達於澮澮達於川縱橫因其地勢以取利  
於水今西北皆其故疆也東南之地爭涓滴於尺寸之  
閒而西北則苦水害豈不異哉又况北之水利尤易於  
南也客曰子亦甚言北之利於水耳而遂謂北易於南

有說乎徐子曰南方披蓑而耕抱溼而穫恆與雨相值  
而長夏時苗將立槁反不得一沾濡爲快乃西北雨多  
於長夏而耕穫之時少天時則然也東南地勢高下相  
懸數日不雨則桔槔之聲人力爲竭考之古者剛深尺  
許遂深二尺溝深四尺洫深八尺澮深二仞而已未有  
如東南轉水於數仞之深者至若京東山之湧泉溢地  
而出河之支流等地而平不易易乎且東南瀕海歲多  
潮患蓋海之勢趨於東南遼海以及青徐則有海之饒  
而鮮潮之患是地勢使然矣奈何棄爲萑葦之場乎客

曰南北水利脩廢頓殊抑何由也徐子曰水利脩廢由於人之聚散而其機則操之自上三代盛時井田溝洫無論也厥後則魏史起引漳水灌鄴鄴以富秦國鄭國渠漑滹鹵之地四萬餘頃關中爲沃野秦以富強至漢文翁漑灌繁田千七百頃而蜀饒富白公穿渠引涇水漑田四千五百餘頃而民亦饒富馬援引洮水種秔稻而狄道并塞之民得以樂業虞詡復三郡激河浚渠爲屯田而省內郡之費蓋三代之時水之爲利也宏自魏以下水之爲利也專然皆在西北之境若東南稱水利

者則漢以前惟馬臻開鑑河而已三吳則揚州之域厥土惟塗泥厥田爲下漢時亦一澤國耳及五胡之亂中原生齒咸隨晉室東遷民日聚而利日興自後錢鏐竊據南宋偏安日墾日闢而財賦遂甲於天下矣嘗考宋紹興五年屯田郎中樊賓言荆湖江南與兩浙膏腴之田彌亘數千里無人可耕則地有遺利中原士民扶攜南渡幾千萬人則人有餘力若使流寓失所之人盡耕荒廢之田則地無遺利人無遺力可以資中興由此觀之則宋室方南之始東南尙有曠土及其季年人多

而田少豪右之擅陂湖以自殖者眾地利盡而民不聊  
生人聚故也至西北之田曠廢久矣以今國家全盛之  
時西北生齒日繁南人爭湊輦轂之下誠使勞來安集  
於其閒則民聚而利無不興固在一旋轉閒耳客曰是  
固然矣然吾聞懷慶紀太守嘗因丹沁支流疏渠成田  
民頗利之紀去田亦隨廢又如真定楊中丞家居亦嘗  
募南人緣水墾田歲入甚饒及滹沱旁決瞬息變爲桑  
田矣豈久廢之餘固有難猝舉者乎徐子曰是因噎廢  
食之論也夫治水之法高則開渠卑則築圍急則激取

緩則疏引其最下者遂以爲受水之區各因其勢不可  
強也然其致力當先於水之源源分則流微而易御田  
漸成則水漸殺水無汎溢之虞田無衝激之患矣彼懷  
慶當丹沁之下游而真定尤滹沱所必衝者也安能久  
而無患哉蓋不先於其源故也嘗考桑乾水發源於渾  
源州經保安之境則自懷來夾山而下至盧溝橋狼窩  
地方衝溢爲患漫至彰儀門先朝屢經脩築爲費不貲  
今保安境上聞有用土牛逼水成田者恐亦不能久而  
無患也若督責有人多方招募使桑乾上流皆引水爲

田則豈惟保安之田恃以無患而懷來以下水患亦殺  
矣予又嘗物色瀛海之間如元城窪羅家灣郝家莊高  
橋鋪章家橋皆連阡黑壤廢爲水區非不可田顧以下  
流受黑洋等九河之水非先致力於其源未可邀利於  
旦夕而終貽水患也客曰子論甚悉然世之疑而不行  
者亦有說矣一難於得人二憚於費財三畏於勞民四  
患於任怨五狃於變習子亦不可不察也徐子曰得人  
固難矣然世固有能任之者不必專如宋人以水利爲  
名亦不必如今制責以水利之職蓋勸農而興水利牧

養斯民之首務也若別設專職於牧養斯民之外則今  
之開府持節者得人以擇藩臬以選守令久任而責成  
之殿最繫焉利興而民不知者可坐致也世之言費者  
吾惑焉夫損數萬金之費於春而收數萬石之穫於冬  
費於帑而償於田此在庸人操什一之利者尙甘心焉  
曾謂謀國者而顧以費爲憚乎畏於勞民者雖蘇文忠  
公嘗有是論文忠公之言曰天下久平民物滋息四方  
遺利皆畧盡矣今欲鑿空尋訪水利所謂卽鹿無虞豈  
惟徒勞必大煩擾所在追集老少相視可否吏所過雞

大一空審如文忠之言民信勞矣予所謂不必別設勸  
農水利之官亦恐其喜事勞民如文忠公之言也設得  
牧養斯民者擇其勢順功敏之處暫出官帑募願就之  
民經畧其端以示倡率之機使民灼然知水利可興則  
必有競勸而爭先者庶令不煩而事自集若槩以水利  
役民使貧民苦於追呼妨其生業而富民反擅其利烏  
可行哉怨生有二妨小民之業怨隱而害深奪豪右之  
利怨顯而謗速吾既不槩以水利役民民無追呼之苦  
怨不叢於小民矣而豪右之利亦國家之利也何必奪

之周禮使世祿地主之有力者與其廣瀦鉅野之可以  
利民者曰主以利得民曰藪以富得民彼小民有利而  
力不能興其利官爲之倡豪右從而率之則借豪右之  
力以廣小民之利方欲藉之矧曰奪乎此何以任怨爲  
也或謂南北治田勞逸不同北人習於游惰猝而驅之  
宜有未從者然彼之鹵莽而耕亦鹵莽而獲若以南之  
勞治北之田則一畝可倍數畝之入其嗜利之心必且  
潛移其好逸之習而其爭先力田者官又稍爲優異之  
必羣然恥逸而趨勞昔張全義起於羣盜其尹河南也



當喪亂之餘戶不滿百全義擇人以脩屯田招徠流民  
遠近咸歸每出見田疇美者輒下馬與僚佐共觀之召  
田主勞以酒食有蠶麥善收者親至其家悉呼出老幼  
賜以茶絲衣服民間言張公見聲伎未嘗笑獨見佳麥  
良蠶則笑耳有田荒蕪者則集衆杖之或訴以無牛則  
召鄰里責之曰彼乏牛何不助之由是比戶有積蓄在  
路四十年遂成富庶夫其勸農力本生聚教誨變荒墟  
爲沃壤豈偶然哉未嘗一日倡之而遂曰習俗游惰難  
以變易其可乎至若不費公帑不煩募民而田功自舉

者則予又得而熟籌焉邊地屯田以餉軍其道有三倡  
力耕之機定賞功之制廣世職之法而已內地墾田以  
阜民其道有二優復業之民立力田之科開贖罪之條  
而已夫大將固偏裨之所稟命者也今諸邊沃土多大  
將養廉之地使肯以地畫井而田以率偏裨則所屬無  
不響應而競田者昔郭子儀因河中軍嘗乏食乃自耕  
一畝將吏以是爲差於是士卒皆勸而耕是歲河中野  
無曠土軍有餘糧其明效也且夫將士捐生以赴敵者  
冀以功獲賞耳若計畝行賞如宋給事廖剛中所云執

未之安與操戈之危豈不轉易此賞一行萬頃不難得者信其然矣今富民得納貲以列武弁職冗而軍政無補也若仿虞文靖之意聽富民欲得官者能以萬井耕則爲萬夫之長千夫百夫亦如之先試以虛銜緩其徵科俟其田入既饒積蓄既充則命以官而董徵其稅就所徵者給以祿佩之印綬得世其官而練集其耕夫以寓兵於其閒真良法也是則屯邊之三策矣民之流離棄業不復者蓋創痍未起催科又亟甚則舉其宿負者而必取盈焉如使蠲其負寬其徵時其賑貸則流離漸

復荒蕪漸闢矣漢之盛時孝弟力田同科蓋務本重農勸率之微權也今若定制有能墾荒闢井者田得自業而輸其稅於官官因稅而稽田因田而定等上者如納粟待銓次者遙授散秩又次者補胥吏而役於官則力田者競起矣贖罪有條借貪墨以行私者何限使令捐貲墾田官課其費與贖罪相當則歸其田而收其稅卽無財宜配遠方者亦得近屬於田畝之間以力墾田而收其贖與常法並行而人亦樂從也此則墾田之三策可行於內地者矣誠舉而行之屯田可興墾田可多又

何必費公出帑而役煩募民哉客曰就子數說尙有可疑者捐生而獲邊賞積汗馬之勞而獲世職欲以田畝之勞並之可乎力田贖罪田固彼之田也稅入幾何恐無以足經費而佐司農之急何徐子曰事豈執一哉審時度勢各有攸宜邊圉孔亟軍功爲先烽火不驚屯田急矣倘屯政舉而邊地墾食足兵強敵至而應之有勝算敵去而守之有長策又何軍政之足羨乎且剽悍者勇於應敵椎魯者樂乎力田各以其長邀上之賞初不相妨卽兵興之時轉餉勤勞亦得與對壘之士並論又

何疑乎至於世祿之法則其繫今日邊務者尤不細也今之武弁因世闕以樹功名者幾人其閒席先世汗馬之勞孱弱僅存豈尙能以練卒應敵者彼富民欲得官者能以萬夫耕則其材智已出萬人之上能以千夫百夫耕則必出於千百人之上使之練耕夫爲勝卒又皆心附而力倍子孫席其業亦不至於遽替其與今之武弁困乏孱弱剝羸卒以自肥者如霄壤矣瀕海之地國初皆設墩臺分戍瞭守以備倭徒以無田可耕日就圯廢今若於瀕海闢田以世職之法屯駐於其閒久之田

益闢而人益眾則海上爲樂土瀕海有通道卽內地有  
梗南北不懸隔於國家設墩分戍之意固相成也又如  
國家分兵而屯授之以田通於衛所之官然久則田隱  
占而屯漸廢蓋田授於官田非己業也惟富民得官屯  
駐則其田固己業後世守之籍核自詳無隱占之患就  
其所入給之爲祿而承之爲業朝廷御之以虛名有增  
課之饒無養兵之費視彼武弁祿入兵費皆仰於官歲  
糜而無補安可同日語也民間子弟入監者例得輸金  
三百五十今若使能墾田三百五十畝者得比輸金之

科則國家一時雖未得三百五十金之用而歲收三百  
五十畝之稅歲歲積之其得更倍諺所謂千鎰而家藏  
不如銖兩而時入此尤易曉也若恐有僞增畝數欺上  
及始墾旋廢之虞則又不然夫僞田增稅歲以厲己智  
者不爲卽有僞田負稅者有司時稽而除其名彼亦何  
利焉若謂國用方詘經費歲少三之一必賴開納以濟  
其急不能徐徐以待歲稅之入則亦思之未詳蓋經費  
之廣由於各邊主客共餉所費爲多若各邊屯政漸舉  
則經費自省况力田者得以田自利而歲稅又取諸田

之所入其輸之固易則以力田而應募者比輸金之人必且倍之其願輸金者自輸金不因此而廢彼二者並行國用又何患乎行之積久田闢而稅廣費省而用足則力田之科與輸金者皆可漸罷矣客曰勝國都燕且百年虞文靖公之議格而未行今國家定鼎於茲又百年矣通漕理財紛然建議而西北水利獨缺焉罕及子何倦倦於今日也徐子曰勝國往事可監已虞文靖公之言既不獲售於恭定可爲之時及季年東南有梗始思其言倣其意設海口萬戶已無救於前事矣今國家

承平日久幸遠方之款貢脩內地之水利千載一時不可失也若圖之已晚其何及乎且予曩上疏報罷時大司農譚公惜予言未行公又自言久歷塞上深知其必可行也王開府寓書於予官身任其事戚元戎欲檢南人之願農者惟開府是用蓋往時南人在塞上者少今南人應募而至者成市其方行募而未收與募退而不願還者皆可驅之爲農卽數千人頃刻而集也然予雖去而二三同志多是予言儻有再疏以請者西北水利其庶乎此予之所以倦倦也談已客散徐子拏舟南去

予既成客談重自紬繹又得一說爲前談所未及而力省功倍者今之以南米售於北者利僅十之三其舟車之費固不少矣若於京師近地開招糴之府出令曰有能於北方種稻爲米而報糴者其價如之則彼之商販南米者必爭去難就易省舟車之勞以爲耕耘之資坐取其利於阡陌之間而無風波之險且不特南商卽北地諸素封者及善幹辦之人每歲售貨於南而獲利者必且翻然改業舍遠就近矣開糴之本意惟取乎開折北之所糴漸多則漕運之所折

亦漸多久之北米充足南漕自可議減矣此亦不煩官府而潛移默率驅商爲農寓農於商似乎可行至於屯田鹽場之可行者爭先墾種以輸課而其餘入者又得報糴於官此卽先朝邊商鹽課納本色之遺意與開糴之法並行而相濟豈非用力少而爲效廣哉爰書之以告當事者

自書客談後

潞水客談

譚瑩玉生覆枝

談畿輔水利者漢唐無論雄霸之間東西兩淀則宋何承矩始之脩溝洫卽以限戎馬意深矣京東沿海一帶則元虞文靖明左忠毅皆嘗建論舉行而徐岡卿潞水客談尤詳核切實余旣讀明史本傳亟求其書不可得後得之吳中藏書家係鈔本精要畧載本傳然此更暢耳

憲廟時曾修畿內水利設四局京東京西京東南京西南怡賢親王總其成高安相國爲之輔簡用才俊爲屬文安陳子翮先生時爲翰林學士以本職爲營田觀察

使經理三載得田七千餘頃 賢王薨逝繼任無人事

遂中止然畿輔閒尙有羹魚飯稻之鄉其遺澤也子翹

先生著河渠志並錄其奏稿移牒大意與罔卿互發明

者多余嘗妄意欲考訂畿輔水利換為一書經之以巨

川如滏陽滹沱清河白溝緯之以支流如滹洛徐廣之

以淀泊北之淀泊即南之湖如東繼之以水泉如雞距

也終之以沿海如天津靜海大約經流可用者少故滄

陽桑乾用於上流而不用於下流支流則為閘壩用之

淀泊則為圍圩用之水泉則載之高地分釀用之沿海

則築堰建閘蓄清禦鹹用之至各書所載多云招江南

之農佃愚謂淀泊沿海則東南之法而附近西山水泉

之鄉開渠分流則一倣西北非西北之農人不可也余

因亟鈔是編與子翹先生河渠志並藏他日拙著若成

將擬為貂尾之續並貽同好有心斯事者或不致河漢

其言耶永清後學朱雲錦書後時道光元年中秋後一

日



明史本傳

徐貞明字孺東貴溪人父九思見循吏傳貞明舉隆慶五年進士知浙江山陰縣敏而有惠萬曆三年徵爲工科給事中會御史傅應禎獲罪貞明入獄調護坐貶太平府知事十三年累遷尙寶司丞初貞明爲給事中上水利軍班二議謂神京雄據上游兵食宜取之畿甸今皆仰給東南豈西北古稱富強地不足以實廩而練卒乎夫賦稅所出括民脂膏而軍船夫役之費常以數石致一石東南之力竭矣又河流多變運道多梗竊有隱

澇水考言附錄  
一  
憂聞陝西河南故渠廢堰在在有之山東諸泉引之率可成田而畿輔諸郡或支河所經或澗泉自出皆足以資灌溉北人未習水利惟苦水害不知水害未除正由水利未興也蓋水聚之則爲害散之則爲利今順天真定河閒諸郡桑麻之區半爲沮洳由上流十五河之水惟泄於貓兒一灣欲其不汎濫而壅塞勢不能也今誠於上流疏渠濬溝引之灌田以殺水勢下流多開支河以泄橫流其淀之最下者留以瀦水稍高者皆如南人築圩之制則水利興水患亦除矣至於永平灤州抵滄

州慶雲地皆萑葦土實膏腴元虞集欲於京東濱海地築塘捍水以成稻田若倣集意招徠南人俾之耕藝北起遼海南濱青齊皆良田也宜特簡憲臣假以事權毋阻浮議需以歲月不取近功或撫窮民而給其牛種或任富室而緩其徵科或選擇健卒分建屯營或招徠南人許其占籍俟有成績次及河南山東陝西庶東南轉漕可減西北儲蓄常充國計永無絀矣其議軍班則言東南民素柔脆莫任遠戍今數千里旬軍離其骨肉而軍壯出於戶丁幫解出於里甲每軍不下百金而軍非

土著志不久安輒賂衛官求歸衛官利其賂且可以冒  
餉也因而縱之是困東南之民而實無補於軍政也宜  
倣匠班例軍戶應出軍者歲徵其錢而召募土著以足  
之便事皆下所司兵部尙書譚綸言旬軍之制不可廢  
工部尙書郭朝賓則以水田勞民請俟異日事遂寢及  
貞明被謫至潞河終以前議可行乃著潞水客談以畢  
其說其畧曰西北之地旱則赤地千里潦則洪流萬頃  
惟雨暘時若庶樂歲無饑此可常恃哉惟水利興而後  
旱潦有備利一中人治生必有常稔之田以國家之全

盛獨待哺於東南豈計之得哉水利興則餘糧棲畝皆  
倉庾之積利二東南轉輸其費數倍若西北有一石之  
入則東南省數石之輸久則蠲租之詔可下東南民力  
庶幾稍甦利三西北無溝洫故河水橫流而民居多沒  
脩復水田則可分河流殺水患利四西北地平曠寇騎  
得以長驅若溝洫盡舉則田野皆金湯利五游民輕去  
鄉土易於爲亂水利興則業農者依田里而游民有所  
歸利六招南人以耕西北之田則民均而田亦均利七  
東南多漏役之民西北罹重徭之苦以南賦繁而役減

北賦省而徭重也使田墾而民聚則賦增而北役可減  
利八沿邊諸鎮有積貯轉輸不煩利九天下浮戶依富  
家爲佃客者何限募之爲農而簡之爲兵屯政無不舉  
矣利十塞上之卒土著者少屯政舉則兵自足可以省  
遠募之費甦班戍之勞停攝句之苦利十一宗祿浩繁  
勢將難繼今自中尉以下糧祿之田使自食其土爲長  
子孫計則宗祿可減利十二脩復水利則倣古井田可  
限民名田而自昔養民之政漸可舉行利十三民與地  
均可倣古比閭族黨之制而教化漸興風俗自美利十

四也譚綸見而美之曰我歷塞上久知其必可行也已  
而順天巡撫張國彥副使顧養謙行之薊州永平豐潤  
玉田皆有效及是貞明還朝御史蘇瓚徐待力言其說  
可行而給事中王敬民又特疏論薦帝乃進貞明少卿  
賜之敕令往會撫按諸臣勘議時瓚方奉命巡關復獻  
議曰治水與墾田相濟未有水不治而田可墾者畿輔  
爲患之水莫如蘆溝滹沱二河蘆溝發源於桑乾滹沱  
發源於太戲源遠流長又合深易濡泡沙滋諸水散入  
各淀而泉渠溪港悉注其中以故高橋白洋諸淀大者

廣圍一二百里小亦四五十里每當夏秋淫潦膏腴變  
爲鴻鹵菽麥化爲萑葦甚可惜也今治水之策有三濬  
河以決水之壅疏渠以殺淀之勢撤曲防以均民之利  
而已帝竝下貞明貞明乃躬歷京東州縣相原隰度土  
宜周覽水泉分合條列事宜以上戶部尙書畢鏘等力  
贊之因採貞明疏議爲六事請郡縣有司以墾田勤惰  
爲殿最聽貞明舉劾地宜稻者以漸勸率宜黍宜粟者  
如故不遽責其成召募南人給衣食農具俾以一教十  
能墾田百畝以上卽爲世業子弟得寄籍入學其卓有

明效者倣古孝弟力田科量授鄉遂都鄙之長墾荒無  
力者貸以穀秋成還官旱潦則免郡縣民壯役止三月  
使疏河芟草而墾田則募專工帝悉從之其年九月遂  
命貞明兼監察御史領墾田使有司撓者劾治貞明先  
詣永平募南人爲倡至明年三月已墾至三萬九千餘  
畝又遍歷諸河窮源竟委將大行疏濬而奄人勲戚之  
占閒田爲業者恐水田興而已失其利也爭言不便爲  
蜚語聞於帝帝惑之三月閣臣申時行等以風霾陳時  
政力言其利帝意終不釋御史王之棟畿輔人也遂言

水田必不可行且陳開滹沱不便者十二帝乃召見時  
行等諭令停役時行等請罷開河專事墾田己工部議  
之棟疏亦如閣臣言帝卒罷之而欲追罪建議者用閣  
臣言而止貞明乃還故官尋乞假歸十八年卒貞明識  
敏才練慨然有經世志京東水田實百世利事初興而  
卽爲浮議所撓論者惜之初議時吳人伍袁萃謂貞明  
曰民可使由不可使知君所言得無太盡耶貞明問故  
袁萃曰北人懼東南漕儲派於西北煩言必起矣貞明  
默然已而之棟竟劾奏如袁萃言袁萃字聖起吳縣人

舉萬曆五年會試又二年釋褐授貴溪知縣擢兵部主  
事進員外郎署職方事李成梁子如楨求爲錦衣大帥  
袁萃力爭寢之出爲浙江提學僉事巡撫牒數十人寄  
學立卻還之歷廣東海北道副使中官李敬轄珠池其  
參隨擅殺人袁萃捕論如法請告歸所撰林居漫錄禪  
園雜志多貶斥當世公卿大夫而於李三才于玉立尤  
甚云


右潞水客談一卷明徐貞明撰案貞明字孺東貴溪人  
事跡具明史本傳舊附錄卷末今仍之案趙誠夫一清  
東潛文稿有書貞明遺事一篇稱史記河渠書漢書溝  
洫志詳關中水利後代不都故諸渠廢絕不復可蹤尋  
明定鼎燕京尤急漕務惟資給東南之粟講求輸運之  
便已爾濬河以通漕護漕則河傷竭三吳之民力上供  
天府之儲而財用常憂其不足我朝雍正初元廩念  
閭閻之疾苦思往哲之善政特開水利營田府於近畿  
誠至計也觀於貞明奏議及其首尾興革之由實足以

資採擇云又稱終明代良策無有逾此者至乾隆九年  
柴潮生侍御敬陳水利救荒疏乃云前明徐貞明行之  
而立敗夫貞明未嘗敗也特撓於浮議耳善乎劉繼莊  
廣陽雜記稱西北乃二帝三王舊都二千餘年未聞仰  
給於東南何則溝洫通而水利脩也故西北非無水也  
有水而不能利用也不爲民利乃爲民害旱則赤地千里  
潦則淹沒民居無地可瀦無道可行虞學士始奮然言  
之郭太史始毅然行之而亦未幾竟廢則以民可與樂  
成難與圖始也語曰非常之原黎民懼焉特重刊貞明

是書俾言西北水利者有所考云咸豐辛亥孟春雨水  
節南海伍崇曜謹跋







國立中央圖書館  
特藏書件大印中 藏印

1930

